

四庫全書

集部

欽定四庫全書

節孝集卷十三

宋 徐積 撰

古詩十六首

復古頌

并序

漢承秦滅學能以經術取士自孝武帝始故三代而下漢為盛至楊隋建進士科李唐又加詩賦之類破壞學者於是天下盡為進士而明經之路寢徙不復矣故楊綰賈至之徒發憤建議而代宗不

能行遂為庸人所沮豈不謬哉皇帝三十六年乃
詔天下復以明經貢士明經古之道也進士非古
也明經之道寢以長則進士之路寢以消此朝廷
之意乎春秋之義貴復古春秋之所貴固學者之
所宜歌也頌曰

其難其難道亦大艱或缺或完戰國盜竊嬴秦暴孽遺
風餘烈所存幾何枯株之柯填源之波漢得天下方有
學者其徒蓋寡孝文孝武稍稍復古仲舒之伍嶮崟崢

嶭窮先王經道乃大明西漢之風與三代同實儒之功
晉魏冠讎學者寢浮不源而流齊梁之間斧斫刀剗大
樸益殘隋唱唐和元氣盡破為斯文禍學者皇皇賦道
大光六經逃藏冶容艷膚繡衣紅襦衆奔羣趨若大有
為謂之背馳終身寒饑物不終盛皇帝有命萬口齊慶
復明經科大張網羅海隅山阿麟之奔奔鳳之軒軒龍
之蜿蜿會稽之竹崑崙之玉牛山之木逢蒙執射伯樂
進馬造父御駕琴瑟既更韶音濩聲復還於今唐虞之

謨夏商之書其庶幾乎天下之賦摧縮消沮迷失道路
革萬世弊興萬世利繫我皇帝臣敢不歌流為太和百
世不磨

暴雨

玉女投壺天大笑千尋火炬當空照老龍行遲天忽怒
雷車壯士礮連鼓黑鱗鐵甲十萬許急把銀河傾作雨
思誠齋夜坐

胸中不平氣忽然凌太虛無人哭一聲半夜思唐衢

逃席

主人雖好事其來不知幾胡不築高垣胡不關重扉不敢直道退遂由邪徑歸飲過即有疾何以慰親闈

有客何為者

有客何為者不穿亦不鑿匣中是何物塵埃漬鋒鏑登山守直道荆榛與溝壑安得百畝田以就斑衣樂

周長官出二子詩相示

丹山一鳳雙雛生十分羽翼三分成未能飛奮先能鳴

纔鳴不作凡鳥聲羽毛安得相混并鵬霄九萬當冥冥
簫韶九奏儀王庭光華舜旦魁羣經

又贈二子

周氏二子千人英余觀其詩余輒驚渾然骨格已老成
凜乎辭句冰霜清不然何以知君名余知必作詩之精
今觀君詩眉且低文章老大無人知少年便莫相輕欺
丈夫壯氣如虹蜺古之庸者猶雄飛青雲自有相逢時

封本堂

四言并序

淮南轉運副使黃公即其所居因地之宜構為棟
宇名之曰卦本堂謂山陽學官曰子能有以述而
賦之否乎學官曰唯唯蓋所謂本者民也譬如植
木培而封之其本必固既固必茂本固而末茂蕃
衍盛大必然之理也即委而弗顧弗壅弗培又抔
其土而去之或斧其榦或戕其枝則木之長也其
可冀乎固君子之所閔也故因其職分設施所好
恤民之災救民之患其務在乎一切便民使夫農

安於其野賈安於其肆各得其安而不失其職通
舟車之貨平關市之征凡一州兩稅者悉奏罷之
其法始於淮南而行乎天下天下受其利矣即世
世弗改世世受其利也封其本者孰大於是以此
名堂誰謂不然

物無其實其名弗至實以先之名以次之事無其實君
子弗名可表其實可考其行信斯名者斯民可見樂斯
名者斯堂可燕可燕可歌使臣之光有乎實惠民悅無

疆

書江氏芝草記後

四言

天門業業洞達通徹地雖幽陰明白昭晰有來即應無
往弗答或旋其日或逾厥月或降吉祥或出妖孽或生
美好或產醜缺或使合并或令分裂凡皆若此其故可
說人之所喜神則懽悅和氣流暢精粹凝結草木受之
形類孤絕其無所苟而不徒設爰有江氏世載其德子
子孫孫能敬勿失其叔有令如出諸意戮力同心道路

相繼二十六喪收歛聚會。在園之北。同日俱瘞。廼有二物以彰厥美。其一維何。是曰靈芝。如蓋上設如杠下持。其色黃紫。其光陸離。其肉堅厚。弗枯弗衰。其二維何。是曰連理。巨榦脩枝。貫通骨髓。物不可間。人不得披。以類攷之。不必異本。其奇若此。其吉勿問。其恍其惚。其恍。必寓諸物。以來神貺。維神之貺。如岡如陵。有德者勝。德雖可勝。其心兢兢。則亦可承維神之貺。必以其類。或大其家。或大其世。敬之戒之。永終厥義。

新安呂公尚書夫人墳 四言一首

彼美新安有水有山有墳巋然百五十年爰有曾孫赤
韞朱軒來守茲土以慰斯墳掃除必躬奉祠必親水毛
陸產膾牲上尊百物皆具千兵駿奔觀者如堵從者如
雲心追無窮誠通無垠溟漠之魄恍惚之魂如關其塗
如啓其門如興于寢如作于室如出黃泉如見白日

謝秀才晦庵

山有武夷水有建溪有猿有鶴有庵可棲有庵可棲云

乎不歸

哀吟贈蔡子驤女

蔡氏之子彼仲女者攷之古今如仲者寡有德之容有德之性所好所習一出於正貌莊而麗氣溫而醇女子之中而有斯人慈良端厚內敏而重終日寡言亦不戲弄字無難易所見輒識不知此女從何而得讀釋氏書欣然有適身之所有皆出自然如何不幸不假之年揚州道中死於六月二十七日暑氣酷烈二十九日三更

大殮形神如生體亦不變其氣甚潔其香甚郁附於身
者何用珠玉不知此女而往何處杳杳冥冥雲霞烟霧
世之所有則維其常若斯人者獨秀孤芳吾於其母是
為內兄哀吟惻惻慰其死生

題淮陰泰山行宮廟

泰山隆隆作鎮于東有如配林在淮之陰厥廟維嚴厥
貌維肖斯民奉之是為別廟

登淮陰古城 并序

蓋以傳考之所謂甘羅城者非也謂之淮陰故城可也余登斯城為之歎息久之蓋韓侯天下之奇丈夫也方其寄食婦人受辱於市其志固已大矣及乎出自亡命杖鉞而起決策東嚮項籍之輩已在掌中而天下勝負定矣其兵一出遂虜魏王禽夏說斬成安威震海內戰勝而不驕方且問謀於敗軍之將西面而師事之一何奇也平齊之後請為假王行縣陳兵藏匿亡命此皆智者之所不為

一何謬也然而雲夢之游蓋亦遽矣此實高祖豁
達大度其弊入於不審而果於用詐遂令無罪無
辜身被囚繫怏怏不能平鬱鬱不可活而至於此
之極也方此之時以義處命能平其心者是何人
也是其所養者已充所充者已固利害不能搖死
生不能變姦人不得施其計辯士不得措其辭確
乎不可拔者也至如韓信者其才雖奇而所養實
不與此故可以處無憾故能卻武涉拒蒯通知義

利之所在也即不可以處有釁而況身被廢辱如
此之甚故其僥倖萬一終之以敗死支體分裂肉
骨糜爛亡宗赤族為萬世之笑豈不哀哉余既為
詩因序其事其亦庶乎登高而賦為功臣之警戒
也

此城不可名甘羅淮陰侯國冤忿多其氣鬱鬱而勃勃
遂令平地生嵯峨

愛愛歌

并序

子美為愛愛歌已失之矣又其辭淫漫而序事不得愛愛本心甚無以示後學余欲為子美挾去其文而易以此歌以解學者之惑其序曰愛愛吳女也幼孤託於嫂氏其家即娼家也左右前後亦娼家也居娼家而不為娼事者蓋天下無一人而愛愛以小女子能傑然自異不為其黨所汙其已艱矣然愛愛以小女子顧其勢終不能固執此其所操心危慮患深之道不得已而為奔女之計也

於是與其人來京師既數年其人歸江南遂死於江南愛愛居京師自以為未亡人也慨然有必死之計故雖富貴百計萬方卒不能動其心以至於死此固不得謂之小節是奇女子也古之所謂義烈之女者心同而迹異按愛愛所奔即江寧富人張氏也張氏納奔妻於外棄父母而不歸以至其父捕去此乃不孝之大者固不得齒為人類禽獸之行所不足道也故余之所歌意有詳畧事有取

捨文皆主於愛愛焉歌曰

吳越佳人古云好破家亡國可勝道昨夜閒觀愛愛歌
坐中歎息無如何愛愛乃是娼家女渾金璞玉埋塵土
歌舞吳中第一人綠髮雙鬟纔十五耳聞眼見是何事
不謂其人乃如許操心危兮慮患深半夜燈前淚如雨
假如一笑得千金不如嫁作良人婦桃李不為當路花
芙蓉開向秋風渚忽然一日逢張氏便約終身不相棄
山可磨兮海可枯生唯一兮死無二有如樗櫟叢中木

忽然化作瀟湘竹又如黃鳥春風時遷喬林兮出幽谷
文君走馬來成都弄玉吹簫纔幾曲不聞馬上琵琶聲
却在山頭望夫哭去年春風還滿房昨夜月明還滿床
行人一去不復返不是江山岐路長前年猶惜金縷衣
去年不畫深燕脂今年今日萬事已絞綃翡翠看如泥
一女二夫兮妾之所羞不忠於所事兮其將何求蛾眉
皓齒兮乃妾之讐不如無生兮庶幾無尤嚶嚶草蟲兮
趯趯阜螽靡不有初兮鮮克有終鴛鴦于飛兮畢之羅

之人間此恨兮消何時
深山人迹不到處
病鸞歛翅巢空枝

一般花下飲一盞

一般花下飲一盞
但是花開不須揀
亂紅亂翠已迷人
猶望桃源迴醉眼

節孝集卷十三

欽定四庫全書

節孝集卷十四

宋 徐積 撰

古詩十六首

題寄亭 并序

唐人亭榭好為美名者當時譏之以其苟於所玩
宴安酖毒弗戒弗勸者也山陽通判吳郡朱公即
其所居因地之宜構為棟宇名之曰寄亭寄有來
去曷常之有如旅人之棲蘧廬也一出一入主人

弗與居處晏然氣貌如故曷者為得曷者為失曷者為喜曷者為戚曷者為寥寥曷者為赫赫然人之常情以去為諱以寄為不臧蓋有避是名而弗往者矣又况肯名而居之者乎是其曠然獨得廓然大悟內虛其心外無係於一物其所以為樂者皆在乎其我而不在于其彼也與夫患得患失問著問龜從相師而問之者異矣如此而弗貴貴而弗歌非詩人之志也

大抵人間同一寓外物之來寓中寓主人於爾本無心
誰使之來誰使去來時無所增吾悅去時談笑亦不輟
惟有山叟與溪翁屋裡閒雲船上月一從古往成蹉跎
失之則憾得之歌不從平路從風波或遭陷穽或網羅
有人啣臂遺其親有人之楚復之秦侯門灑掃寧苦辛
牛衣涕泣傷賤貧誰人銜鬻來上書誰人乞貸留公車
誰人入關便棄繻誰思躍馬疾其驅更有隋時二隱夫
欲將林壑謀金朱倒行之輩尤可吁當時自欲烹其軀

却是揚雄所性恬誰須名字學韋賢積薪可恨汲生言
不道真風任自然自然處者其為誰以寄名亭如此奇
俗人所患在失之安知達者靜者心平夷達者洞然無
所蔽靜者泊然無所累無蔽無累無所營其中主者性
與誠登斯亭兮觀斯名人間萬事皆可平

耳邊啼鳥喚不起

耳邊啼鳥喚不起有人醉卧春風裏被花迷入夢魂中
却上烟霞弄瑤水

偶述

淮陰寄食卒為將
南陽朝卧卒為相
孟軻之道其如何
枉尺如何直尋丈

有客不為賦

有客不為賦而乃求榮階
是猶適吳楚却背東西來
孟郊從進士聞者徒相咍
退之髮已禿知己其誰哉
余獨謂不然此事何足哀
但恐子之道未足為奇孩
子歌堅誠好不為利所回
得則為顏氏失則為墮豉
為子歌一

闕為子酌一杯余歌為爾宜何歌余聞日月如飛梭但
憂其道不到古窮通之事余如何

八月十四夜

有人望月吟太虛半夜秋風生碧蘆碧蘆風起吹老桂
吟聲入月驚蟾蜍明夜中秋更好吟兔肥蟾大桂成林
桂兔之外有何物玉池水到中秋溢秋風刮水如霜滴
中秋月下作贈呂秘校

去年中秋月與子共吟詩今年中秋月與子嗟別離前

書約相見頗說中秋期夜久風霜寒對月空相思

寄汝弼

山陽如許大不與我同住翩翩鴈與鴻可惜分飛去淮
中極清泚亦有洲與沚一鴈自安棲一鴻望江水

寄張宜伯

空中氣候何蒼蒼風力不勁雲不黃一冬無雪農家忙
為憂麴麥不豐穰若有雪時滿引觴仍將詩去報庾郎
牢收浙帥厨中羊恐有劍客過城隍

山寺雪夜諸僧圍
爐有美酒肥豕之

思生中有劍客提劍而起俄而携一銀槓
酒一肩羊乃浙帥厨中物也出北夢瑣言

漁者

縛竹編茅雜亂蓬四籬俱是野花叢莫道江湖山色好
籬落不禁秋後風秋後風從西北起身上蓑衣冷如水
夫妻却在釣船中兒孫走入蘆花裡夫妻不會作活計
辛苦賣魚沽酒費兒孫身上更貧窮白日無衣夜無被
昨日前村酤酒處今朝忽見無人住聞道江南地更暖
移舟急望江南去

釣者

有人口誦浮雲曲手把瀟湘一竿竹
荻花洲上作茅庵
坐看江頭浪如屋

漁翁

白髮老翁心似鐵網盡溪魚猶未歇
船中渾是賣魚錢
買酒烹魚醉明月

漁父樂

六首

水曲山隈四五家夕陽烟火隔蘆花
漁唱歌醉眠斜綸

竿蓑笠是生涯

無一事

見說紅塵罩九衢貪名逐利各區區論得失問榮枯爭
似儂家占五湖

堪畫看

討得漁竿買得船歸休何必待高年深浪裡亂雲邊只
有逍遙是水仙

誰學得

飽則高歌醉即眠只知頭白不知年
江遠屋水隨船買得風光不著錢

君看取

管得江湖占得山白雲同散學雲閒
清旦出夕陽還不知身在畫屏間

君不悟

一酌村醪一曲歌回看塵世足風波
憂患大是非多縱得榮華有幾何

濰陽

嘗聞唐李氏世號為賢妻以力營七喪或謂難庶幾孰知蔡家婦其事乃同之豈特在中饋無往而無儀孝於其所尊慈於其所卑既知義所在終能義所為我生至此極我嫁逢百罹其屬死畧盡其骨俱無歸身為未亡人心乃真男兒以已任其責無忘須臾時但恐事不濟安知恤寒饑乃捐奉生具而為送亡資面不御膏沐首不加冠笄金珠鬻於市文綉容何施更無囊中裝唯有

身上衣殆將截其髮幸苟完其肌所得蓋良苦所積從
細微如此十年久猶以為支離日下卜諸良宅兆相厥
宜一舉十八喪一旦得所依手自植松楸身亦沾塗泥
何暇裹兩足但知勤四肢居者嘆於室行者泣於岐鳥
亦助叫號人思操纛裡冥冥長夜魂所獲喜可知鬱鬱
佳城中不為中道尸卒辦其家事少慰而心悲義深海
可涸行堅山可摧孤誠貫白日幽光凌虹霓吾聞古烈
女聲聲非無奇一死蓋易處一節亦易持至如張氏者

使人尤歔歔誰為孝婦傳誰為黃絹碑亦有淮上翁為
述灘陽詩移書太史氏無令茲逸遺

臨卧

臨卧更飲一杯酒自唱仙謠拍雙手春風欺醉入懷來
留下亂花香一斗

哀哀詞

哀哀復哀哀哀哀至此極孤兒與慈母中路忽相失恍
惚須臾間終日不復得誰復坐我堂誰復入我室誰復

飲兒酒誰復哺兒食兒饑復誰念兒寒復誰恤耳不聞
慈語目不見慈色譬如行路人日遠於一日行人猶可
期遠道猶可追天窮地盡處一日猶可歸哀哀復哀哀
此去無盡時誰言生離別不如死別離君不見人已閉
門鳥已棲黃昏塚畔孤兒啼

李陽冰篆

書之有古篆文之有六經秦漢而下浸以徙隸學基路
生重扃其間述者亦世出牛蹄之水纔一泓先生之志

在復古胸中直氣何森森獨乘騏驎追大朴執縛浮銳
攘攬槍手中一筆千萬變天風號令驅雷霆地蟠螭屈
體既具鷄立虎視勢乃成剛柔伸屈有常勢天地之道
陽與陰傑然出者其勢聳嶽仞五千磨太清盤然屈者
非一屈黃河九折來滄溟龐然一畫勢自若老將堅卧
中軍營至於一點亦有象地丘人目天之星先生大體
貴淳古輕輕重重重齊權衡周家太師負黼宸高冠大旆
朝王庭唐虞二帝正揖讓臯夔稷契環兩楹聖人作樂

有大本別挾淫哇完古音大匠作室以規矩悉去艷軌
除斜撐專車骨節世不朽今乃一縱而一橫巨靈以手
遏大難印入山骨磨不平雄恢嚴毅不可犯手中常握
十萬兵信乎創字自有說宜必象形而象聲天地之大
有萬象萬象不能遁其情嗚呼篆法乃如此大哉剛健
純粹精走獸之類為麒麟飛鳥之類為鷩鵬蹊徑之類
為大路垣牆之類為堅城以德論之為聖人以法論之
為朝廷傍睨衆字乃可笑太山之重鴻毛輕亡國之主

好逸豫兒女子輩多驕淫聖人之後惟孟予古篆之後
唯陽冰金渾玉璞天下寶嗟乎世俗多聾盲欲行古道
世輒笑欲言古道世輒驚志之所之在一賦一箒之器
徒易盈雕蟲篆刻滿天下不矜實行矜虛名六經塵土
塞高閣聖人之道成坎坑況乎古篆固可棄胡為獨好
于先生

節孝集卷十四

欽定四庫全書

節孝集卷十五

宋 徐積 撰

律詩二十六首

弔屈平 并序

漢文帝時賈生親弔屈平于湘江其後揚子復弔
之其書謂之反離騷自岷山而投諸江客有松滋
令朱明府至幾赴官故因其行附而弔之以是詩
也

洞庭湖口君須過為我回頭弔屈平
楚國誰曾憐直道
湘江依舊寄冤聲
反騷義命賢揚子
作賦譏傷陋賈生
若是獨醒無不可
荷蓑猶可釣而耕

重陽日訪馬存秀才席上寄崔公太守

區區拖損一綢袍
行到郊居力已勞
有命自知誰畏禍
無災可避謾登高
黃金菊滿花情薄
白玉樽深酒興豪
盡日使君人不至
淵明吟醉也陶陶

哭彥規七首

并序

徐氏居鄉與蔡氏最舊鄰屋對宅凡已數世矣故
余知蔡氏為詳於彥規又詳也然以斯人足以知
我我亦足以知斯人不必鄉鄰之舊也初彥規
為兒時與兒曹羣行余在簾箔間望見覺其氣貌
異於羣兒意甚念之後一日忽來刺謝然後知為
彥規矣取其所為文讀之已與時輩不類蓋其辭
皆所自出又能自立意理不蹈不襲凜凜可畏矣
才固出於性也然後至於充積盛大也如此宜其

文名冠其東南之秀而賢士大夫所以親慕者不獨在乎文而已也余外氏在關中自祖父母而下凡八九喪積數十年未葬彥規却有關中官即與之買地又為之謀葬其棺衾器皿一切所須自首服而下裳衣烏履無一物不具葬有月日而彥規病矣即以成事付其孫王正行其所未了者獨未為埋銘一事不見其棺就窆耳蓋彥規平生用心其義大率類此而世俗必待見而後知之也彥規

卒官京兆其守呂公哭之甚哀應襄事所須盡出
呂公也而至於謀及家事如鄭元於孟氏也於是
諸公遣使相屬有二主簿者唐君劉君也亦忠於
其事近乎孟氏之有樊子也孟氏無兒女二季俱
在江南東野以六十四歲赴興元之辟道病卒於
闕鄉其妻買棺用二人舁歸洛陽此亦不足為窮
也唯其不幸無子耳彥規兒女六人以四人自隨
自寢疾至屬續常在骨肉眼中同官問訊朝夕在

門食飲藥物不問可知其得所也易衣而後斂擇木而後具棺不知凡用若干人舁歸兒女護喪道中早晚饋食其伯兄與二季率內外親屬迎喪於洪澤葬于先塋既葬而虞設几筵饋食如平生時嗚呼神乎其安之乎子可無憂矣孤兒女有所依不失所也諸蔡以骨肉之恩同謀婚嫁在數年間耳二子使從師學凡我鄉里之人必有忠於教誨者焉子雖不幸矣將亦以此自慰也古之人或死

於亂死於讒嫉誣罔幽憂怨懟不平之忿或死於
浮死於驕死於毒害少恩死於不及已甚而最甚
者姦諛佞邪情狀暴露羞辱氣沮以至於死也彥
規官為主簿隨所居官以行其義也面無邪色口
無邪言身無邪行所以事上官也生於平世何所
戚耶君子謂彥規生為有義死為正命故謂之有
終也嗟乎彥規生平不幸動輒有礙所欲者不得
為所為者不如所欲唯葬王氏一事臨死時適無

礙耳使之平生無不幸盡其所欲所為及於物者
何如也古之人既貴用事矣而不如意者十常七
八何況匹夫賤士乎此君子所以常恕而不恕者
常已甚也凡吾言所以及此者非以示後也將以
慰彥規於九泉耳喪至之日余扶疾往哭其棺已
下將掩壙也因感范巨卿事意有所愧既見於詩
即夜夢彥規見予於僧廊握手號哭嗟乎彥規雖
死猶能相恕且不忘我豈顧不能為張元伯者乎

我自不及巨卿也

已矣哀哉死有終青衫就木未為窮義如有枉榮斯辱
事苟無邪蹇勝通力致全喪關右帥泣尋孤櫬郭西翁
精神入夢非生及使我低顏愧古風

初余視子髮垂肩及至成童便聳然憂患纏來成白領
聲名隨去入黃泉孤甥見恤情非淺暴骨收藏義可傳
多少文章零落盡朝廷何處訪遺編

與君相得久忘言晚更傾腸共豁然剡盡丘陵平作路

決開溝澮合為川古人刎頸終相殺世俗操心愛脅肩
六十老翁能有幾却尋舊友向黃泉

有時半日兩敲門語罷南窓坐北軒意外得文哀絕筆
理中論事酷能言須知是物非無本若論斯人自有源
不蹈不襲真所性洪河自古出崑崙

青衫伴我情彌重白首期君事忽乖天下若教俱好義
道傍安得有遺骸且將綿蓋孤兒寢誰折荆為稚女釵
吟至此篇還索酒更持薑桂坐寒齋

我誦千濤噴雪詩急提筆去寫僧扉碧蘆陰處評文坐
黃菊花時載酒隨老大為兒親送藥衰翁賴子少呼醫
最是秦中葬枯骨不須銘墓只鐫肌

道傍有無車馬通朝復莫兮秋且冬草頭半折木已空
鳥啄噤兮霜與風白鷗肚上殘日紅一丘莽蒼黃昏中
亦有松陵怨詩否此詩誰訪談玄翁

贈胡大夫

好讀奇書好運籌橫刀常賦玉關秋銅符正選千兵守

金印猶虛萬戶侯
鷁趨潮來家易到
龍投池上劍難求
應須讀盡平蠻策
二廣封疆近吉州

寄呂帥

五首

北邊控扼重瀛州
虎視鷹揚屬壯猷
盡道敵人新斷臂
安知漢將欲吞喉
為文法度堆青簡
奉使勲勞半白頭
六路全秦與全魏
不須野戰覓封侯

師屯十萬建牙旗
大纛森森重使威
燕頤將軍宜繡帽
龍驤戰士愛犀衣
銀鎗作隊行春去
蠟炬成林校獵歸

更看鈴齋憑几處文如布陣翰如飛

北人勇悍真勍敵漢將威名重太山
隱若金城當一面橫如鐵陣控三關
防秋甲士屯田去牧馬氍毹避塞還
儒帥著書閒暇否兩淮人物太平間

帥臣所統在燕南事事如窺指掌間
仗鉞精神堪破敵搃吭形勢正當關
十州部分連滄海一道軍聲過黑山
文武非徒尹吉甫前時方叔已平蠻

事皆術內宜謀帥奇在胸中合運籌
戰士常騎突陣馬

將軍須養犒師牛雅歌坐燕春歸塞緩帶行吟月上樓
且勸主人宜飲酒邊城六月已如秋

贈劉懋功 并序

縣令劉懋功赴官貴池見積於南郭出詩一章乃
泚上李次翁所贈并出其簡見索繼和因次其韻
以為贈言詩未及錄又得一詩於枕上併酬次翁
累詩見寄江南早春到官時候梅花正開如驛使
來并附此詩次翁得詩不一覽而止也即須依依

引首東北也白鬚老柳俱在目前其日之夕携酒
賦詩夢遊南郭矣

李令歸來歲月深池人得子貴其情定知縣事依前簡
還見官曹復舊清如問以思謀所貴能嚴而恕罰斯輕
芙蓉水上人相憶因寄梅花附此聲

贈汪判官

庾郎醞藉本仙材適自王家池上回楊柳風前紅蠟炬
芙蓉香畔白髯顚便搖健筆揮詩藁仍替衰翁倒酒罍

說與泗州倪發勾夢隨淮水向東來

贈劉閣使

聲聲雄名駭世間堂堂誰敢舉頭看
高談豹畧今無敵誰污龍泉血未乾
蠻貢急趨金殿肅胡蹤深入鐵山閒
關中自號詩書將肯愧齊王在將壇

寄路倅

此中可恨恨無山猶勝紛紛富貴間
綠野盡充公好尚朱門安得水回環
對雲披住雲邊浪踏月空行月下灣

好戴宮紗著宮錦時時吟去復吟還

和范君錫觀梅 二首

君看梅艷似何人不畫蛾眉色自真冷寄北風淮上雪
暖思南國嶺頭春莫嗔俗眼偏相棄若比天桃太不勻
我共參軍同所好折來酣笑插烏巾

月庭有影終難辨雪徑無香不易分江上肌膚新出浴
嶺頭環珮忽藏雲少他幾幅青羅袂解與何人繡段裙
我愛此花真一色將詩急報參軍

和呂祕校觀梅 二首

若論君顏色瓊瑤未足珍
花中誰作偶物外獨先春
有艷皆歸樸無妖可媚人
江南看已厭洛浦種還新
日晩巫山雨墻低宋玉鄰
施朱其已偽傳粉亦非真
堪把歌詩贈何辭唱和頻
君篇為第一便可獻楓宸

又

寒梅雖淡薄乃是物之珍
天與離羣性花前獨步春
江臯多冒雪山路不逢人
根本蟠雖久花趺長自新
妖姿

雖共處正色願相鄰縱使紅為飾何如素是真北人殊
未識南國見何頻須假東風力春香到紫宸

寄顧瀛州

本朝謀帥得雄剛氣語無邪面目方掌握事嚴持斧鉞
咽喉地緊扼豺狼鐵林猛士新翻陣幕府奇書舊滿囊
可減邊兵三十萬匈奴走入黑山藏

送倪敦復

三首

手持報簡人歸後足步迴廊角住聲但恐舟行隨早晚

此時秋色半陰晴
明朝路向雲邊望
今夜詩須枕上成
四壁無燈窻有月
直無老夢到三更

連朝送客經三日
每夜忘眠約數更
枕上尋船無夢去
牕間望月有詩成
莫愁病叟添愁思
為恐行人趁曉晴
急送村醪追後乘
要教飲處憶南城

各自逢人且寄音
仍須南北夢相尋
已成鳬鴈分飛勢
更值淮湖連日陰
每論事時於義切
重來別後此情深
山東定飲登高酒
剩折黃花望我吟

節孝集卷十五

欽定四庫全書

節孝集卷十六

宋 徐積 撰

律詩四十一首

寄呂海州

嘉問

朱輪海上新迎部
玉笋朝中舊立班
曾屈高風來泮水
宜將老夢到胸山
霞張列炬紅彌野
潮作飛霜白叩關
三四百川為第一
日華先照郡樓間

贈至幾

五首

淮東學士求新範海角仙人棄舊居不用更携揚子醕
但來同噉庾郎蔬赤墀待把文章獻黃綬難親議論餘
泮水宮中方就講何煩留下橐中書

西城塔下逢君後南郭庠中借館居正共孤甥棲暖席
未如老圃灌寒蔬直生豈敢嗟年暮餓死猶慚乞祭餘
六十衰翁如可教更忙須遺所藏書

僧房幾載如禪定州序今來以義居直道褐衣猶勝錦
枉身牢鼎不如疏何心敢冀漿先饋無善兼令歲有餘

最是學文方自訟只堪把筆教兒書

南州本是諸儒秀上國宜從大隱居
別我好留仙竹杖送君欲獻野芹蔬
所慚下士文章陋未報諸公禮義餘
若見汝陰前太守為言迂濶正談書

誰家門外柳雙株滿屋清風是我居
霜後正逢籬下菊雪前已貯甕中蔬
沫流口角耽吟睡毛墜頭心久病餘
努力正如初學輩老瞳昏澁夜看書

復明經

上欲求稽古天書下四溟儒風久湮鬱詔意乃丁寧削
剥因唐氏源流自漢庭春秋披日月易象炳丹青禮樂
搜潛奧詩書抉杳冥今焉拘注疏何謂復明經

和蔣龍圖

吟翁如共老莊游物外能齊樂與憂黿背不為三島客
魚竿終泛五湖舟何須大使詩來問合使幽人病為瘳
陶令菊花猶有在未知肯飲一杯不

送呂清叔

四首

人為多情乃送君
余雖不送情更深
破窗半夜風霜冷
危坐燈前為子吟

平生志在青雲霄
十年不飛藏羽毛
夫子乃是知我者
吟詩贈子何辭勞

忽忽一棹向東行
抖擻空囊無一金
買魚沽酒向村市
典却蔡家焦尾琴

深院吟哦夜半時
須有鬼神聽此詩
吟聲徃徃到明月
淮上有風搖桂枝

和蔣穎叔 二首

城外人傳大使來吟翁正共客銜杯赤帷便記長安道
駿馬仍思御史臺義色可令姦膽破剛姿不為疾風摧
公能幾日山陽住待報舟人且倒梳

盛德尊光不召賓玉環香弁自迂身北窓卧者陶元亮
大使車中陸子真自道老來心愈壯若論兵後氣彌親
所慚舊學非精義仰負高風如古人

送人之洛陽

待到伊川濯盡塵洛陽城下且留身
文才得似長沙傅
試問如今有幾人

寄蘇子由

午日移陰後行人罷燕時路從西郭去
船值北風吹夢
裡猶迴首心中欲附詩從來義如此
兩意自相知

贈慎叔良

我是東臯叟君居在屋東已曾同硯席
最好共耕農
蕙帳兼棲鶴藍輿亦帶筇若評樵採事
須更喚鄰翁

寄田大夫

老掾成迂闊，彌年信不通。
白頭負高義，病眼想清風。
奉使更三節，題名在兩宮。
有人能舉類，舊德起淮東。

寄慎朝奉

一別三千里，俱為六十翁。
日中多俗事，枕上憶清風。
聞子生雙鳳，看書快兩瞳。
以囊仍貯果，寄我厭包紅。

寄張景修

東南未回客，行樂又經年。
吳市花朝酒，松江月夜船。
窮

簷無屋住廣殿有詩傳若論平生事無如任自然

寄朱博士

吳有朱夫子相知凡幾年心憐閉門叟書附過江船行
已為人表文應許世傳臨風有餘誨時復慰皤然

和李閔中

幕官真有道野叟是何人彼此新詩贈兼之古意醇若
論今世事前是老農身誰謂芙蓉客能來相顧頻

送王潛聖

四首

前日喜重來今朝復送迴出門無僕馬為子走風埃遠
客有詩贈短亭無酒杯南州雖得士東觀却遺才

又

一自渡江津茫然不記春船諳淮上月馬慣洛陽塵可
去問唐舉未須慚買臣終令舊關吏還似棄繻人

又

兩翅慢如雲倦飛歸故林褐夫懷有玉貧女缺無金北
闕報初罷南陔情更深升堂拜親後先看白頭簪

又

南北倦遊客離家幾問津
文隨年共老名與德俱新
射策謾稽古抱關猶誤親
窮通只如此寧愧斷機人

送李守

千兵州將已嚴裝
猶入西庵曳繡裳
坐燕起來中酒色
行春歸後落花香
難酬高義情彌重
欲述餘恩事更長
但看楚人遮道處
草頭垂淚濕殘陽

寄林處

昔者淮南使剛中輔以和生前無所苟身後事如何有
子泣枯草無人誦蓼莪林公為不死下客謾悲歌

送蔣憲

二首

節用黃金詔紫泥皇華仍賦使臣詩三千里路爭迎送
五十州官待指揮盡解纍囚南到日却尋急傳北歸時
趣裝亦有明珠否八樹成林桂一枝

遠服兵刑事可知全吳分野有星移漢家詔使登車後
蜀道忠臣叱馭時山色迎來城到近桂香隨去馬行遲

梅林亦是公家管廣帥應須寄北枝

和蹇受之

四首

出乎志者莫如詩商也能言得自誰雅頌漢時猶未遠
風騷齊後若何衰翰林飛去秋鷹健工部行來老驥遲
亦有孟韓聯句好姓張員外合肩隨

右詩

清而勁者笛為奇哀絕孤高更不卑日暮誰人凭樓處
月明離婦擣衣時何煩作賦攄師憤最好傾心破主疑

一弄便能歌怨曲唐衢義哭合相隨

右笛

醉鄉恍惚在空虛若論真恬世所無坐客任貪清者聖
今人何作古之愚宜教側帽穿花過更好敲門趁月沽
誰似陶潛最瀟灑籃輿歸去不須扶

右醉

笑樂真情豈可誣樂而不笑是何拘日中無事逢碁局
春後有花兼酒壺輕俠兒前撫手掌滑稽傳後掩髭鬚

江南陸俊還安否乞與筇枝使自扶

右笑

謝趙朝散

一識明侯二十年老農依舊未歸田學無所得成迂濶
義有其終尚愛憐下筆自書青竹汗上樽仍附玉山泉
如斯厚意難空飲待折梅花配酒船

謝秦少游

并簡參寥

講罷潮溝吟綠槐手持銅鉢待相陪青瞳好客難留住

白足高僧又帶迴今日許尋陶令菊明年約寄陸生梅
龐公妻子方炊黍且報舟人莫起桅

送李漕

淮上衰翁何所為有人寬厚誤相知光華奉使方行部
款密成書更附詩在泮飲時常睠睠乘輶過日倍遲遲
緣公禮義如斯重好寄梅花近北枝

送雲鶴山人

倦鶴尋流水閒雲歸故山青囊書在否留取教人間


和孫元規資政游園 三首

禁烟娛樂且須頻二月風光特地新
料得壺中無俗客更聞歌者盡陽春
酒來花下斟瓊液茶向松間碾玉塵
應笑謝安空寂寞東山終日為何人

紅作簾帷翠作裯隨軒歌舞一時新
未知醒者何如醉且向樽前莫負春
烟重柳梢寒蘸水日高花徑暖生塵
自從三月芳菲後誤入桃源又幾人

竹為籬落水為鄰草碧花紅一徑新
盡日歡聲連綠野

滿城和氣入韶春歌姬汗濕眉間翠舞妓香生襪下塵
酒陣詩兵皆大敵未知元帥屬何人



節孝集卷十六

欽定四庫全書

集部

節孝集卷

十七至
二十四

詳校官庶吉士

臣范逢恩

檢討

臣

何思鈞覆勘

總校官編修

臣倉聖脉

校對官中書

臣田尹衡

謄錄監生

臣沈恕

欽定四庫全書

節孝集卷十七

宋 徐積 撰

律詩三十一首

贈玉師失鸚鵡二首并序

僧有玉師者養能言鳥一日食飽輒去作失鸚鵡

二詞以遺之

淮邊羈思嶺頭雲紺彩騰時電影奔一日恰如時輩事
十年空負主人恩良因外貌貪馴性何況中心狎巧言

他日雕籠如再養玉環金鑲鐵為門

淡煙白浦月黃昏倚遍闌干空倚門接翅定思雲外侶
偷棲應望水邊村盡傳世上新詩去惟有籠中舊物存
便是却來休更養不能成事只能言

謝蔣穎叔二首

赤帷大乘皇華使鳴玉銜金訪教官紅旆緩搖春日晚
清風先入泮宮寒一瓢鄭叟醉初醒五柳陶翁卧不安
便著青衫迎謝傅更無茶果薦杯盤

吟翁未去水雲間，坐假虛名屈上官。
忽似仰山心貌竦，更思言事骨毛寒。
繡衣自可招黃綬，星弁須來對鶚冠。
莫怪開門迎候早，今冬無雪卧袁安。

泣謝陳德任

義重江湖叟，情施墟墓間。
孤魂慰長夜，老淚濕衰顏。
一奠方銘骨，三年更倚山。
更分心兩處，恍惚自收還。

和湯令

所幸生平世，甘於貧與疴。
被輦嗤杜簿，挾勇恥荆軻。
已

恨逢君晚無辭教我多野芹容一獻更索採樵歌

召汝弼

外府新讎校問君來不來春隨流水遠日被落花催煩
子神仙御盡予賢聖杯何時松徑下同坐踏蒼苔

賑飢篇贈程守二首

楚有循良守流民萃一方薪蒸溫病骨菽粟飫飢腸永
欲充編戶無心憶故鄉恩深何以報惟有一爐香

又

乞得諸倉粟流民獲所依已燃薪禦凍仍用楮為衣病
骨蒙新暖羸肌復舊肥故鄉雖有屋此處可忘歸

送山陽宰高奉議

大夫歸旆暖搖春正好浮淮向汴津一片青山迎去棹
兩堤芳草伴行人當官事業今彌劭滿橐文章老更新
記取吾鄉蒙實惠吟翁亦是舊編民

送吳坦求

師仁

清風門外客移船南郭衰翁但惘然未吐赤心無限事

重尋皓首幾何年
茶須飽飯吞甘溜
酒便空心注玉泉
醉倒淮東鄭雲叟
吟哦聲調入雲煙

贈穎叔

一從西郭恩初重
又至南庠義更深
自恨杜微無所聽
若忘龔遂是何心
已知霜露情彌感
更值淮湖氣作陰
昨夜起來無月色
誰知我為蔣公吟

答李閣中節推

王家池上芙蓉客
曾把新詩贈野人
不道形骸成土木

却言風月長精神凡禽易識甘題鳳野獸難分誤叱麟
努力唱歌酬不得枉教白雪落紅塵

和沈判官

精神滿腹其才裕清白當官所性存國士正居王儉府
野人未識李膺門詩筒便恐傳新句酒席方陪飲上樽
從此定須懷賤叟他時來訪我兒孫

謝蔡子驤

好客重來直上廳寵家妻女合炊秔名言一坐令誰聽

老病雙瞳為子明
有道長官方就祿
無能司戶欲歸耕
如斯出處俱平易
義理難時即共評

寄朱至機

二首

雲出無心鶴倦飛
還家懽笑綵為衣
雪醅為壽酒初熟
玉鱸供甘魚正肥
侍燕每操筇杖去
看花常御板輿歸
故人願子無窮慶
莫使淮南音信稀

六十詩翁愛幅巾
清江濯盡洛陽塵
若無野客來同巷
合有山僧去作隣
醉卧不知雲到枕
吟行唯許鶴隨身

眼看富貴真如夢說到窮通定笑人

寄穎叔

南郭茶杯菊未香西簷老柳覺踈黃家無縣令雙鳬舄
夢有仙人五色羊梅信易傳來嶺北鴈書難附過衡陽
定知遠俗懷公義若說威名背負芒

送婁六秀才

趨時之悔真良說枉己之徒信厚顏學者淵源當似海
丈夫持守要如山挺然特起麟孤角鄙矣誰窺豹一斑

為子臨行雙泣下白頭人倚夕陽關

和楊守清容堂

并序

山陽太守楊公知開封縣作堂於治所名之曰清容士大夫美之以公自道也於是作詩累成大軸公不以某為陋使得與觀焉因記東漢陳蕃之徒清而少容其蔽也隘故至於疾之已甚而遺患天下漢氏之所以蔽也唐之郭子儀賢將相也考其心迹有容民畜衆之德然失在太寬故其下多不

奉命失師之律其咎如此然後知清而有容足為
全德以此意述而為終篇也其辭曰

赤縣堂名清與容主人兼得古人風此間便是烟波上
何處更尋山谷中志激懦貪無弊俗詔宣寬大有餘功
若將全德評今昔應笑陳蕃郭令公

書狄梁公傳

李氏山河勢若終手提長劍截長虹請將唐室中興事
可比汾陽再造功直道不為邪黨敗逆鱗深得諍臣風

儒生若有逢時幸未必勲勞盡在公

夜賞春寄敦復

莫道山陽官苦辛大夫未是不閒人
晝來琴上披尋曲夜入花間點檢春
拖袂帶歸香滿袖迴燈引去蝶隨身
高才自有風流格吟作吳謠事最新

戲答君錫酣戰之句

檄書挿羽來何速鐵騎成林勢未分
北壘噉聲雄似虎南營殺氣猛如雲
陣前劒客投犀袂帳外歌姬曳繡裙

且待揮兵酣戰罷却行三舍避將軍

和崔刑部凭欄

伏讀凭欄意私心輒慨然聖徒須企聖賢黨必思賢主
上方高枕民間正息肩使君當自逸治狀已光前

示汝弼

十載交情義有餘離羣還歎索然居一番思我須成夢
每度人來定寄書此日相從尤款密他時何處覓迂踈
回來徑哭青塹墓莫向南城問舊居

和汝弼

蘆葉銜來逢北鴈
筠筒信斷候南風
看回白馬殘陽後
吟盡閒雲落月中
酌水何時尋陸子
寄裙前日為梁鴻
孟光多謝閨房秀
醉酒亡繒是我翁

呈敦復

朝奉清心自皎然
應將外物比腥羶
詩歌與性相娛樂
聲色因喪永棄捐
有義睠余東野舊
無能留子北窓眠
殷勤為醕陶家酒
更送斃杯與竹牋

代書寄次翁

病叟雖迂濶交情自不疎
喜逢歸去客為謝寄來書
入幕評文後臨川視事餘
攜壺吟兩柳還夢野人居

上蔣公

公如鄭相憐窮士我在所知韓
孟間下客心形渾是木
高賢禮義欲齊山十年用力人
誰及百計酬恩事總艱
投筆若從班定遠橫戈先出玉
門關

和路朝奉退居

彼美東南雋堯時作外臣有何歸去物全得老來身一
節都無變平生總是真勇於羅守退甘似庾郎貧士望
今誰耦儒林舊絕倫其心醇是本以德厚為珍避盜抽
園笋容奴取庫銀時情付流水外物盡浮雲久矣謀閒
坐誰乎願要津書藏萬卷好詩換一筒新聚道為家法
分糧卹外姻清風還楚部餘惠在江民藉草宜蘭佩穿
松稱鹿巾鱸材須活鯉羹劑要香蓴日暖花村路風溫
行浦春耽吟白居易沉醉李仙人驥鳳鳴來久駒雛教

已刪義終光國史名自壓朝紳顧我愚而陋煩公愛以
仁深恩無報處北望正勞神

送至機

閉門有幸藏衰病策杖無因奉俊游繩縛筋骸方就枕
火燒皮骨正思秋覽君健句如逢樂慰我孤懷勝凭樓
見說束裝行未得夢魂先到楚江頭

節孝集卷十七

欽定四庫全書

節孝集卷十八

宋 徐積 撰

律詩四十首

寄路倅洪澤阻水二首

黃金宮闕紫瑤關
鵷鷺思陪玉笋班
仙仗好教鳬鳥去
客槎却在斗牛間
有為義對霜濤湧
無敵詩同鐵陣閒
誰報京師羣弟子
先生吏隱鬢毛斑

莫教容易過龜山
多少人心願復還
更有南城黃綬客

但吟西戶綠楊間
纔經濁汴無澄浪
且趁清淮洗醉顏
安得就公歌一曲
緩吟遲步夕陽灣

和潘朝奉鄒國公配饗

丹書一下人神慶
美矣先朝貴孟公
能與百王興漏典
長令萬國仰遺風
躬為獨行生無祿
道配彌高祭有宮
孰謂濶迂窮至死
正而窮勝枉而通

和路朝奉新居十五首

世俗紛紛事總虛
詩翁今作逸人居
勤穿東地緣栽竹

喜占明窓為著書
近市好賒春肆酒
就淮仍買晚罾魚
忽撐小艇來西郭
不問皆知訪仲車

詩翁愛酒典衣沽
六子將孫侍燕居
正要白家醇釀法
不須劉德偽金書
厨經雪後炊無黍
門近淮瀕食有魚
何以獻公尋一物
庾郎三韭載盈車

昔也聞名誦子虛
今來白領隔城居
新詩解道論頭句
舊客仍移把臂書
北郭高風真隱豹
南州循政喻烹魚
歸時見說臨川路
父老爭留太守車

陳傅門前客姓徐有何智術佐閒居接簷俛仰令遮雨
縛竹縱橫為架書趣雪剷田移草木和灣汲水貯龜魚
上元已過清明近更約尋花不用車

誰家住處近田廬朝奉抽簪就退居竹葉已成新歲酒
梅花未領故人書呼童解袂捫飢虱趣日開箱曝蠹魚
一似散仙閒到夜卧屏仍看五雲車

坐想堂前弄白鬚蒲茵筍席正高居綵衣六子傍供膳
錦髻諸孫自教書愛士主人新置榻清身太守舊懸魚

更吟整斗論頭句勝却西庵詩一車

不辨時人直與迂濯纓且喜近淮居朝衣脫後常耽睡
野史脩時或借書恨乏青山供採藥愛看白鳥伺吞魚
東園賣酒花開近待看詩翁倒載車

簿領脫來如一夢身名全後喜寧居生來自信無非義
世上何緣作謗書所養有源如大水其賢可樂比嘉魚
願公八十為更老玉幣三招乃就車

自是平時大隱徒何須水宿與山居都無長物垂空橐

却有閒房聚逸書近見雪消思野蕨遙呼船問憶江魚
卸帆便去尋村酒醉使兒孫推鹿車

身著練袍履用蒲鶖冠鳩杖稱郊居家中但乏青囊印
坐處便看黃卷書賃屋為無揚子宅休官非為武昌魚
長年不出何妨事況是門懸致仕車

夷白先生好對廬醉吟處士作鄰居幅巾自去呼樵父
蠟屐何時訪竹書坐想高談搖麈尾情知相許跨鯨魚
更憐同姓陪樽酒勝却荀生得御車

路家巷口是何渠半似城中半野居已退白仙常按曲
未歸陸俊謾傳書雪消牆外逢挑菜日暖門前見捕魚
更有花間行處樂舊時歌舞願隨車

好養玄猿共鶴雛茅茨蓋屋竹間居家無越使千家橐
腹有齊臣四部書一自臨川登畫鷁便煩別駕掌銅魚
吟哦還作詩仙退恰似駢鸞鳳駕車

世間詩淡鄭雲叟壽且安寧陶隱居愛酒自開浮蟻甕
耽詩如好換鵝書籜冠戴後搢筇竹鶴氅披來控鯉魚

學作蓬萊吟醉客何須駟馬駕安車

西庵翁上北城隅為望臨川舊守居所恨足無雙翅
但將詩代一函書甥教洗榼多沽酒妻使磨刀細切魚
酒掃待公來獻壽親扶杖履醉升車

送路倅

二首

所居有本能行義此去無人不戀恩情似綠波長送棹
夢如飛絮忽隨軒帳前舊學千餘子橐裏新文數萬言
何日從君溫故業待操几杖問淵源

我曹初作綵衣郎白紵先生正擅場大筆可堪專簿領
遠圖終恐用文章清淮絕唱新盈卷綠髮奇篇舊滿囊
此去功名都未測公年方永力方強

和石宣德五柳亭

安正

五柳神君氣貌端所希所向靜而安每思往行投閒地
肯逐時情慕熱官秫酒易醒風戶猛葛巾難卧月窓寒
也應種得東籬菊好置籃輿自在觀

送秦漕

昭昭所性諍而辨坦坦其行樂且恬公義已令淮部肅
清風更入朔方嚴行無瑕類孤標聳養有根源數器兼
猶使樵夫來教我樵歌為述古人謙

送宮教郎朝奉

博士高才御點名往陪羣俊盍朝簪門頒錦詔先生入
帝錫緋衣後殿深設坐宮官嚴絳帳執經王子肅青衿
堯親已被欽文化更倚師謨稱上心

送李憲二首

使臣車用赤帷裳帝選明侯重嶺陽後乘未離淮分野
先聲已遍越封疆宜教廉吏心如水但恐貪夫背有霜
大抵當官須去害人間所在有豺狼

五船鳴鼓待嚴裝且赴雙蓮舊燕堂不用水沉薰紫綬
過梅林後一身香

送程守 二首

楚人相喚守河梁鳴角樓前駐畫橋未肯放船來北渚
且教載酒去東堂傾城和氣傳芳草沿路清風配綠楊

見說新班名玉笋赤墀登對待馮唐

聞道西城欲解船病翁懷抱更騷然將心已附諸生輩
策杖難隨庶老肩負義本非今世俗報恩終愧古人賢
不才自訟無他技合作詩歌更百篇

送人從軍

古來雄雉是從軍問罪殘羌正有名黑槩將陪黃鉞帥
銀鎗隊擁鐵林兵十州假息恩涵覆百載逋誅事貴盈
首惡便應囚巨檻壯圖難議請長纓須空大漠還降卒

好決洪河刷逆城報國主人心更勇西山勒頌得班生

贈山翁

耳聽人言似不聞心於時事若無分一生已是青山物
更欲將身換白雲

山翁荅無分之句

身邊外物雖無語事到中心自有分莫道山翁頭似雪
心如劍戟氣如雲

謝張才甫印竹杖 二首

老來無物可搯頤
正要一莖印竹枝
滿袖清風秋月淡
陶潛遠遍菊花籬

手中忽把一枝筇
稱我逍遙林下風
不是西征車上物
臨行自合與詩翁

戲呈魏評事 三首

北齋有酒夜開門
獨酌燈前酒一樽
只被詩魔無處避
待教醉魄戰吟魂

我向燈前置酒盃
南軒北戶一時開
如今正是花時節

且放春風數路來

紫府瑤關夜更深阿誰閒醉洞中春
呼童去問煙霞事
只見桃花不見人

寄江子和

為問江先輩何時訪白鬚老懷何所慰
得子寄來書

和路太博

莫教竹馬誤羣兒謝守行春未可知
落盡梅花寒食近
却應桃李怪來遲

謝穎叔

能歌白雪公常事不醉黃花我幾曾一絕便勝書一紙
情知高義過劉弘

寄王觀文

扁舟欲泛湘江月亦泛洞庭湖上春十年此意逢今日
且喜洪州有主人

別崔刑部

黃金何日上燕臺致主猶輕樂毅才便是功名未如意

報恩寧肯惜重來

送秦少遊

叟罷耕耘妾罷機
恁恁人意甚牽衣
可憐數里笙歌地
但見一番楊柳稀

節孝集卷十八

欽定四庫全書

節孝集卷十九

宋 徐積 撰

律詩三十三首

送慎彥鄰赴舉

天子詔多士喜君為此行美璞必三獻大禽終一鳴

寄蔡子驤

為報廬陵客逢人且寄聲不知無恙否何日到南城

送管久中

半開醉眼天方曉急遣詩筒去已遲別恨離愁無盡處
青山綠水有窮時

贈鄭毅夫

致主濟民道未完白衣卿相且盤桓龍頭已是輸君早
更向麒麟閣上看

戲答何楚才酒肆

身在塵埃氣在雲丈夫貧賤豈須論且為韓信淮陰事
休著相如犢鼻褌

和張文潛晚春四首

留春是芳草送春宜柳花日長花正亂誰倚闌干斜

又

問花開何遲問花底急飛人間惜花少閨苑等花歸

又

易貯千尋水難藏一點春也須幾杯酒還似送行人

又

渡水衣須扱穿林手自披經春脚力軟但恐上山遲

二老寄朱廣微二首

二老相思又隔年
僧窓閒坐復何緣
吟翁最好鹽城住
時把歌詩付酒船

寄聲切問朱監利
對面勤詢劉貴池
或見廣東程使者
為言收得寄來詩

送曾子開

楊子江頭風正寒
行人莫歎渡頭難
江頭楊柳豈常在
但向江頭洗眼看

送慎彥鄰

只知北海鵬將化不謂丹山鳳正棲
却憶吳江橋上月
共君長嘯入雲霓

吳舒信道

淮干風起木枝搖
頷下羹甌一尺高
我是折薪扶耒手
中丞且莫笑麤豪

呈張敏叔

子善居官事可宗
淮西聲譽接淮東
皆知所識明無敵

兩主斯文敏有功麗賦總應輸老匠清詩恰好送秋風
便乘急棹辭譙守酌酒仍吟塞上翁

譙守謂蔣公也作此詩時未知蔣公

所之乃今知在符離

贈探花郎

探花車騎似游龍未入桃園先閨風衫上十分新染翠
衣間一點半開紅身如驥子無雙俊人報鰲山第幾宮
便是醉仙何處去上林園在五雲中

寄呂秘校

淮上詩盟不可尋
詩筒來往負初心
風花雪月雖無限
留待他年共子吟

贈余進士

江南風物清溫好
關內河山氣勢雄
更看蜀中山水秀
一時兼取作吟翁

寄王潛聖

誰言急景似飛梭
我把光陰欲快磨
却想殘春笑君處
無何有路覓君多

答范君錫

有人惠我一枝花
五彩粧成千萬葩
蜀紙寫詩酬國艷
吳餅汲水貯香霞
半酣酒色從人贈
盡帶春風入我家
醉倒吟翁君不見
兒童偷與插烏紗

上胡先生

昨夜重思太古音
確然獨抱一張琴
因何不聽吾夫子
枉被雕蟲累到今

和潘朝奉

大人高調我旁酬韻欲更時更少留待學鸞歌聲已嘎
將追驥乘老而道曉隨帆去雲連海暮望潮來月滿洲
須道詩翁非世俗年家情義幾時休

和呂秘校十首

董子書幃正寂寥阮君何事顧吾曹兩篇有若雙瓊贈
八句多於一字褒莫恨潘安頭早白須知郢客調彌高
鸞凰豈是塵埃物待看青雲振羽毛

王子如今未夢刀不須感慨論官曹寢郎悟意猶為相

鄼尉知名固可褒嗟爾歲華何太速顧予儒業若為高
四詩已有重箋意肯學區區鄭與毛

東平心事本雄豪何必才名獨慕曹學比今儒醇且奧
詩如古義刺而褒鄒之夫子誠堪嘆霸者將軍未足高
賢傑固當謀遠到莫論山岳與鴻毛

能建功名是俊豪區區時輩乃兒曹班超投筆寧無志
樊噲橫行謝見褒兵法每羞孫臏詐將才惟愛武侯高
他年不負東平約待假偏師入不毛

我謂君才似楚騷文章自可作清曹但持古道徐而待
莫顧時人毀與褒水以源深流自遠竹因根老節彌高
如今且作東山卧萬事紛紛比一毛

東平夫子困徒勞又著青衫詣選曹州縣頗聞輿論屈
朝廷當用詔書褒囊中莫把詩編去輦下方虞紙價高
曼倩若教為近侍舍人須愧古無毛

方今天子急賢時不信王通願已違梅福九江雖好遁
陶公八駟亦難飛世排韓愈為文僻客顧揚生載酒稀

多謝好詩來贈我曉齋歌誦暮而歸

汾上儒生又續詩陽春巴調本相違聊因扣角攄深憤
安得摩天逞快飛陶氏弄琴乖俗甚井丹持刺出門稀
有時入市謀甘脆懷橘攜壺即便歸

太平儒者好吟詩鼓腹而歌事豈違顧我才華常患少
喜君辭翰動而飛不憂陋巷簞瓢罄惟恐蘭亭唱和稀
更約山翁同一醉梅花將謝燕將歸

吾道窮通自有時功名豈便與心違摩天未逐溟鵬奮

欽翅尚如籬鷓飛鳴鳳卜遲君莫笑玉山醉倒事何稀
梅花將謝剩沽酒待向花前倒載歸

贈蔡子驤二子

鳳子能雙舉新從日下回日邊是雲霧却帶越書來

節孝集卷十九